

1627-8.

Զմեղապարտ զԱստուածատուր զպիրս յիշեցէք յաղօթս ձեր, ո՛վ պատուական հարք և նազելի եղբարք: ... ԹՎ. ՌՉԶ գրեցաւ ժամագիրքս: [Ի Կամենից]:

1628.

... Յիշելոյ արժան արէք զիս զանարժան
ԶՅակոբ երէցըս Թօխաթցի տաժանական.
Որ եմ պանդուխտ յայսմ աշխարհի տարարնական,
Լեհաց երկիրն, ի նոր քաղաքըն Զամոսցան.
Այլ և ըզծնողսն իմ յիշեցէք ի ժամ հայցման,
ԶմեծաՀաւատ հայրն իմ Աւթուն, զմայրն իմ Աննան.
Ոչ ժամանեալ նոցա ի հասակ ծերութեան,
Այլ ի միջակ տիս հասակի վախճանեցան.
Եւ զվարժապետն իմ բարեբախտ արիական՝
ԶԱյվաթեանց Յակոբ անուն սուրբ քահանայն.
Իմաստիք լի գերակատար ի գիտութեան,
Հոգւով մաքուր, մարմնով ճգնող ի ծերութեան.
Եւ զամենայն ըզմերձաւորս իմոյ արեան,
Եւ զժողովուրդ այս քաղաքիս զամենեսեան.
Զծեր և զտղայ, զերիտասարդ և ըզկուսան.
Եւ որք եղեալ են հաւատով ի գերեզման:
Ի թուականի մեծ տումարիս արեթական
Որ էր հազար եօթանասուն, այլ և վեց ամ,
Ես մեղաւոր շարագրեցի սակաւ զայս բան.
Ընծայեցի բանասիրաց ի վայելման.
Զի եղիցի սա յիշատակ ինձ անվախճան,
Եւ աղօթող առ Տէր Աստուած միշտ անխափան.
Այլ և լիցի փառաբանող Երրորդութեանն,
Հօր և Որդւոյ և Սուրբ Հոգւոյն, միշտ յաւիտեան: ...

Արդ գրեցաւ սա ձեռամբ Յակոբի սորին շարագրողի բազմամեղի և յոգնասող յանցաւորի, ի յիշատակ հոգւոյս տկարի. ի թուականութեանս հայկական տումարի ՌՉԷ ամի, ի 25 յունվարի ամոյ, յանգ էլաւ շնորհօք Ս. Հոգւոյն, ի քաղաքս Զամոսցա, ընդ հովանեաւ Ս. Աստուածածնին: Եւ ի ժամանակս յայս կաթողիկոս ի Ս. Էջմիածին ոչ գիտեմք թէ ով որ է. վասն զի յանցեալ ամի՝ որ էր թուականն Հայոց ՌՉԶ, վախճան ընկալաւ Տէր Մեղքիսեդ կաթողիկոսն ի Կամենէց: Բայց առաջնորդ Իւովայ էր Տէր Նիկողայոս նորընծայ յաթոռ իւր. զոր Տէր Աստուած ընդ երկայն աւուրս պահեսցէ. ամէն: